

DISPUTATIO MEDICA INAUGURALIS,

*Quam De*

*USU ET ABUSU*

**MERCURII**

*IN LUE VENEREA,*

Die XVI. Mens. Septembr. Horis ante & post Merid.

PRÆSIDE

**JOH. DANIELE MAJORE,**

Phil. & Med. D. & Prof. P. Facultatis

Med. h. t. Decano,

*PRO LICENTIA*

Cōsequendi summos in Medicinâ Honores,

defendendam suscipiet

**JOH. NICOLAUS SCHIPPEL,**

Smalcaldensis.

---

KILIAE,

Literis Joach. Reumanni, Acad. Typogr.

M DC LXXIII.

MEMORIAL

FOR THE

REMOVAL OF THE

REMAINS OF

THE



# CAP. I.

De

## *Lernâ Malorum Venerea.*

### THES. I.

**S**I in Medicinâ tres constituere liceat Furias, extra dubium est, inter Morbos, qui ob diuturnitatem Chronici dicuntur, nullos atrociores, & hominem ad mortem usque multipliciter magis enervantes, lentâque nece interimentes, inveniri posse, quàm Hypochondriacam, Scorbutum, & Luem Veneream.

II. Quarum ultima præsertim eò formidabilior est, quò majorem sola ferè Syndromen Morborum ac Symptomatum, quàm reliquæ conjunctim, habet: Eodemque, quod semel invasit, Individuo non contenta, contagiose, ac levi negociò ad plura divagatur; Hypochondriacâ & Scorbuto, habitatione, ut sic dixerim, suâ acquiescentibus.

III. Et licet difficile, imò impossibile videatur, ob diversitatem Causarum, Ætatis, Sexus, Temperamenti, & Loci, illam Syndromen, dum omnibus Individuis non una eademque est, accurate determinare; in plerorumque Curatione tamen, Remediis aliis nihil proficientibus, ultimùm tandem ad *Mercurium* confugiamus: ideoque ut ejus cautissimè habendus *Usus*, & magnitudo periculi, ejusdem *Abusu* orientis, eò clariùs ob oculos ponatur, quicquid etiam ex *Botallo* fortè quis obgerat, Recensionem Venerearum Ægritudineum, *Morosam* saltem *cenfuram*, *vanasque ac odiosas divisiones* nuncupante, *lib. de Lue Ven. c. 1.* non incommodum morosumvè futurum puto, si Catalogum



gum quendam præcipuarum illarum Ægritudinum breviter prius afferam, quæ, tanquam noxii Flores, in hortulis Venerum crescunt, & tanquam flagello multifido illos excruciant, quicunque vel vagis ac impuris invigilarunt Amoribus, vel per incuriam etiam, aut infortunium, citra congressum, ex solò oris, manuum, aut aliarum corporis partium, vel etiam vestium, aut lintheaminum suspensorum contactu, aut *suctu lactis* ex Nutrice clam spurcâ, in similis mali contagium præcipites aguntur: cuius rei Exemplum peculiare Dn. Præsidi notum est. Acre fert *Hildanus cent. 5. obs. Chir. 100.* aliquem Scabiosum, qui fortè in lectum, sudore Venereo infectum devenerat, insanabilem Luem exinde contraxisse.

IV. Morbi itaque primùm, ratione Generum distincti, e.g. sunt Hi: *Cachexia*, ex Ulcere Venereo, non perfectè curatò. *Contabescencia* aut *Marcor*, vel Extenuatio corporis. *Febris Hæctica*, in Lue confirmatâ, hominem usque ad mortem comitans. Vel etiam *Febricula* alia, Tertianæ tenorem referens, in Biliosis. Aut *Febris continua* à Bubone; aut calidiusculo & tumente Inguinum abscessu. *Decoloratio Corporis*, suffragante *Hippocrate l. 2.* Prædictorum (etsi ibidem non de Venere contagiosâ, tamen de immoderatâ, loquatur: *Si sæpius Venerem exercuerit, corpus decoloratius erit, & majore lassitudine tentatum.* Porro *Macula Cutis*, nunc parvæ, instar lentiginis, aliquando latiores, & livido rubræ, nunc flavescentes; augmentum Luis Venereæ significantes. Quæ *Rubedo*, inquit *Forestus lib. 32. Schol. ad Obs. 4.* *Si disparuerit, paulò post fere revertitur, aut pustulas de se edit.* Vel imprimis *Tubercula* passim. *Erysipelas*, vel *Rosa*, Bubonem interdum præcedens. *Elephantiasis*, *Scirrhi*, *Tophi*, aut *Gummatæ* subcutanea-



nearum partium ; Præcipue verò supra perioſtea ; quæ ingraueſcentis mali perſpicua ſigna ſunt. Vel *Puſtula* duræ hinc inde in ambitu corporis ; cum vel ſine cruſtâ ; Sanioſæ , aut non ſanioſæ ; ex quibus itidem Mali ferociam aliquam , niſi jam tertium gradum ejus , arguimus : & discrepantes magnitudine , figura , colore , caliditate , tempore , aut loco , juxta diverſitatem prævalentis in Corpore vel Sanguinis , vel Bilioſi , Pituitoſi , Seroſi &c. Humoriſ. *Deſluxum pilorum* , ob Alimenti deſectum , vel corruptelam. Quod tamen , ſi ſine aliis notabilibus læſionibus corporis accidat , primum tantummodo & infimum gradum mali notat. *Bubones* item alicubi , parvi primum , nec doloroſi ; in aliis tamen etiam doloroſi ; quos interdum præcedit Eryſipelas vel Roſa , ut ante diximus. Quod quidem etiam in Bubone non Venereo quandoque accidit ; differentiæ tamen rationes aliquas dat Celeberr. *Sennertus* (Med. Præct. Libr. de Lue Ven. c. 6.) quas ibi vide. *Glandularumque Tumores* alii. In confirmatâ item interdum *Ulcera Maligna* variarum partium , fiſtulosa , calloſa , cancroſa ; neque cutim modò , ſed vel ad ipſas Carnes , Muſculos , Tendines , ac Perioſteorum Texturas penetrantia.

V. Aut , ut paulò diſtinctiùs agamus , *Morbi Venerei* in *Capite* præſertim obſervandi quandoque , ſunt e. g. hi : *Tubercula* & *Puſtula Capitis* duræ , cum vel ſine cruſtâ , & ferè ſine dolore , ſubitoque exortæ. *Deſluxus capillorum* , Italis *la Pelarella* dictus ; & præſertim , (inquit *Foreſtus* Libr. 32. Schol. ad obſ. 4.) *Si quis Areas habet circa Crotaphitas* (Muſculos Temporales) & in occipite , à Morbo Venereo eſt. Inſuper *Faciei decoloratio* & livor. Imò plane Ejusdem *Carcinoma* exedens , ac hominem ſenſim interficiens.



*Frontis Tubercula*, *Papulæ* carnosæ, *Tophi*, *Pustulæ* : ex quibus, inter alia, signum tertii gradus morbi desumitur. *Pustula* item in *Temporibus* erumpentes. *Superciliorum Lapsus*. *Ophthalmia* quandoque etiam, (in *Plethoricis*) *Sub oculis* circulus *Lividus*, qualem in *Menstruatis* videre est. *Narium Tubercula* aut erosio. *Catarrhus* tenuis & aquosus, per *Os* & *Nares* familiariter affligens. *Oris* *Amaror*, & *siccitas* (in *Biliofis*.) aut etiam *Aphthæ*. *Barbæ* defluxus, ejusdemve *Pustulæ* duræ, cum vel sine sanie, aut crustâ. *Labiorum Tumores* duri. *Palati* exulceratio, aut corruptio, adeò, ut & *cibus* & *potus* sursum per *nasum* transeat. *Glandularum* in *faucibus* *Tumores*. *Tonsillarum* & *Uvulæ*, vel *columellæ*, *inflammatio* aut *relaxatio*, ut *propendeat* : vel ejusdem *totalis corruptio*.

VI. In *Thorace* vel *Collo* ; *Pustula colli* subtumidæ ac rubræ (in *sanguineis*.) *Tumores Thymi*, vel *Glandulæ*, in regione *divisiones Arteriarum* & *Venarum subclaviarum* sitæ : à cujusmodi *Tumore* quadantenus *vox clangosa*, vel *sonora* fieri solet, cum *crebriore sputatione*. *Gutturis Exulceratio* tandem *lethalis*. Et *Phthisis* *Juvenum*, qui *nimiùm fortè impuriori Veneri* addicti sunt ; juxta *estatutum Hippocracis*, Aph. 9. *Tabes* (Φθίσις) iis *maximè aetatibus* fit, quæ à *decimo octavo sunt anno*, ad *tricesimum quintum*. *Intellige* : non *culpâ ætatis*, ut *talis* ; *aliàs enim multò plures in Phthisicose* evaderent : sed ob *incontinentiam*, *Juvenibus* quàm *Senibus* *familiarior*.

VI. In *Regione Abdominis* *maximè omnium* *seges morborum* *foecunda* *propullulat*, occasione *congressûs præcipuè habitî*, indeque *contracti Miasmatis pravi*, adeò, ut non *præcisè semper necesse sit*, *Epar*, *Lienem*, aut *aliud Viscus sanguificationi inserviens accusare*. *Quin potius,*



tius, quò Venereum Spiritale Miasma, istà aut simili occasione devehitur, ibi effectum etiam suum fat ostendit. In Inguinibus & pudendis præsertim, unde notanda itidem, quæ sequuntur. *Inguinum Bubo* in aliquibus; *Abscessus* vè, aut *Apostema* in aliis; rubens, calidum, ac non nihil tumens, Febricula complicetur. *Pustula* in *Virgâ* & *Pudendis* reliquis plurimæ. Unde Lues Venerea à quibusdam *Variola grandis* dicitur. Et eæ quidem squamosæ, siccæ, vel purulentæ; imò cancrøsæ, eoque periculosiores, si ante perfectam curationem evanescant. *Pudendorum Ulcera* inflammatoria vel callosa; serpentia; figuræ variæ, & coloris; & foetidum ex iis Pus, admixtâ sanie citrinâ. Aut minimò *Illorundem Excoriationes* aliquæ, in Lue incipiente. *Tumores Præputii*, ut Glans vel planè non, vel non sine dolore tegi possit. *Ejusdemvè Callus*. *Pustula Glandis* primùm parvæ, miliares, & albæ, sine dolore, cum levi pruritu; ipsamque instar coronæ cingentes. Quæ si rumpantur, *Ulcera* albescentia fiunt, & crescente morbò, profundiora, callosa & dolorosa. *Erosio* purulenta *Glandis*, foris ac intus, ut, quò intensior ea sit, eò certius etiam ac sensim Materia Virulenta, viridescens, cum dolore, & Ardoris urinæ successu, profluat: quod communiter *Gonorrhoea* dicitur, Venerea & Saniosa, ad distinctionem *Gonorrhoeæ* benignioris & veræ, in quâ propriè dictum Semen, vel copiosum, vel acre & calidum, vel aquosum ac tenue, invitis interdum excernitur. In Nautâ quodam, ut est apud *Forest*, l. antè d. obs. 17. *Glans*, absumto *Præputio*, vix hæsit, ut aliquam pudendi partem Chirurgus jamjam vellet abscindere. *Meatus Urinarii Caruncula* aut *Verrucæ*: veletiam *Ulcera*, sanie turpi manantia. *Testium* inflammatio. *Sphincteris* tam  
Vesi-



*Vesica*, quàm *Ani* Exulceratio. Ipsaque *Vesica*, aut *Intestinum Rectum*, arroſa, adeò ut excrementa invitis egrediantur : Cujus rei Exemplum in Nobili Puellâ quâdam, quindecim annorum, quæ Feriis Bacchi vestimenta Viri Juvenis clam-infecti induerat, observavit *Hildanus* Cent. I. Observ. Chirurg. 100. *Pustula Perinei*, *Ani*, & vicinarum partium, (in Lue confirmatâ.) Vel planè *Ani* fordidæ *Ficus* & *Condylomata*, aut *Cristæ* : de quibus *Jonstonus* Med. Pract. [cap. d. Morb. Intest. Recti] videatur. Inque Foeminis seorsim, *Pudendi* ipsarum *Pustula* rebelles, & contagiosæ : *Cristæ* vè prominulæ. *Condylomata* item, vel *Rugarum* nodosarum in *Cervice Uteri*, cum ardore & dolore intumescentiæ. Ejusdemve *Muliebris sinus Exulcerationes*.

VIII. Aut cum indifferentiâ tandem ad Sexum ; *incalescentiæ Artuum* insignes, etiam tempore Hyemis, in Volis Manuum ac Plantis Pedum. *Duri Tumores Brachiorum*. Inque cute eorundem, & partibus proximis, *Exanthemata*, *Pustulæ*, *Scabies*. *Crustæ* item, *Calli*, *Rhagades*, vel *Fissuræ*, cum Cutis crassitie : ex cujusmodi solis *Manuum Fissuris*, Luem delitescentem in Scortis seprehendisse scribit *Foreſtus* locoſ. cit. dicens, quod imperfecte curatò morbo succedat. *Ungues leprosi* quasi, aut impetigine, in digitorum summis, exasperari. *Ungvium lapsus*; & similia.

IX. Quid mirum itaque, si ex pravis hujusmodi Morbis, tanquam Fontibus, Symptomata etiam varii commatis, quasi Rivi æquè impuri, promanent ? Uti e. g. sunt : *Nausea*, vel cibi fastidium. *Anorexia*. *Melancholica*. *Visus* hebetudo. Ipsaque cœcitas ; aut *Surditas* ; in Lue confirmatâ. Vel minimùm *Auditio Tinnula*. *Dolores* verò



verò imprimis sub initium Morbi, vagi, modò in Muscu-  
lis, modo in Capite, Collo, Artubus; & circa vesperam  
ingravescentes. Hinc verò in aliquibus *Dolores pudendo-  
rum* quoque jacutissimi; & magis fixi: unde Lues ipsa ali-  
quibus Pudendagra dicitur, monente, quem supra lauda-  
vimus. *Sennerto* Med. Pract. lib. 6. part. 4. c. 1. *Dolor Vre-  
thrae* maximus, Tempore mictionis, ob carunculam in  
Virgâ enatam, vel Ulcus internum, de quo ante dictum  
est. *Dolor Suturarum*. *Somnus* ut plurimum interruptus,  
aut nullus, ob modo-dictos dolores partium, ab horâ 9.  
noctis circiter, usque ad tertiam matutinam, non rarò  
affligentes. *Memoria* Læsiò. Imò *Epilepsiam* quoque in-  
ter Signa Luis inveteratæ refert Idem *Sennertus* l. d. cap.  
6. Deq; *Raucedine* Vocis res vulgò sat est nota. Ac de *Amis-  
sâ eadem* vide *Forestum* lib. 32. Obs. 22.

## CAP. II.

### *Seorsim de Venere, in Ossa sæviante.*

#### THE S. I.

**V**ERùm nos nulla adhuc *Ossium pathemata*, quorum ma-  
gna quoq; habetur varietas, enarravimus. Inter quæ,  
quod eorum *Intemperiem* concernit; sicut plurimæ Fœ-  
ditates Venereæ Ossium, in aliquo Tumore, Corruptio-  
ne, vel Carie consistunt, exortæ ex Nutrimento illorum  
peculiariter corrupto, & acrimoniam nactò causticam,  
prout, in genere, Luis Venereæ causa continens, in mor-  
daci quodam, Virulento, & putrefaciente Veneno Spiri-  
tali, facile multiplicabili, consistit verisimiliter: Ita nihil  
frequentius, quàm naturalem partium Crasin vel Tem-  
peraturam per illud insigniter viciari.

B

II. Ad



II. Ad *Tumores* autem & *Continui Solutiones* pertinet e. g. *Exostosis vel prominentia Ossium*, ratione *Nodorum*, *Tophorum*, aut *Gummatum*, corrupti sæpè sub-  
tùs Ossis *Periosteio* ac *Musculis implexorum*, cum *dolore*, plus minus; *majorum*, *minorum*; *antiquorum*, *recentium*, in *Lue Venereâ* confirmatâ: quæ, præmissis ac  
intercedentibus *Evacuantibus congruis*, probè *emollien-*  
*da*, *resolvenda*, à *cariosis Ossiculis* (si quæ subsunt) *libe-*  
*randa*, & vel *planè urenda* (nisi sint in *Articulis*, *Nervis*,  
*Tendinibus*) *abradenda*, aut *excindenda* sunt, ante-  
quam *Corpus Unctione Mercuriali* tentetur. Aut, ci-  
tra *Exostosin*, *Caries* aliàs, & irreparabilis *Putrilago ni-*  
*grescens Ossium*, (quamvis & citra *Luem Veneris* à causis  
communioribus fieri soleat) tàm simplex, quam cum  
*periosteï corruptione*, ut humor acris & pravus translu-  
det, nec nisi *acribus Medicamentis*, imò *Ferramentis*  
*candentibus*, *Scalpris*, *Malleis*, *Cultris* auferatur. Mo-  
dum vidè imprimis apud *Aquapendentem*, Operat. Chir-  
urg, Cap. 115. *Forestus* lib. 32. schol. ad obs. 13. in hoc casu  
ait, *Euphorbium* desquamare *Ossa* eâdem die. Et huic  
Malo non absimile videtur quod in *Chirurgiâ Barbettianâ*  
(part. 3. lib. 1. cap. 3.) *Cancer Ossis* (Belgicè een Been-  
vreeter) vocatur: species *Cariei*, quæ hucusque à  
nullo Medicò satis accuratè fuit descripta, ut Autor  
existimat: quale quid tamen etiam de se gloriatur in I-  
taliâ, dexterrimus *Petrus de Marchettis*, in fine Ope-  
rationum Chirurgicarum, *Ægritudinem* istam, à modo  
pungitivi doloris, *Spinam Ventosam* nominans, ortam ab  
*Humore caustico* prorsus, corrumpente primò *Os*, hinc  
*Periosteum* perforante, usque dum *Ulcus Carni & Cuti*  
etiam superveniat. Malum vel ideò dirum præ reliquis  
quasi



quasi omnibus, quod Cancro Ossis vel partium Molliorum curato uno, alii alteribi mox prodant se.

III. Utque distinctius in adumbrandâ breviter *Osteopathia Venereâ* pergamus; ecce hæc porro sunt Amoris impurioris gemmulæ, aut præmia reliqua; *Caries Cranii*, tam quoad externam, quam utramque ejus Laminam: quas, superstitè vitâ aliquandiu, exelas à Lue Venereâ, notat *Riolanus*, *Enchir. Anatom. lib. 6. c. 6. p. 431. Caries Nasi* item, aut Palati. *Dentium Lapsus*, aut corruptio; quæ gradum morbi vehementissimum indicat. *Tophi & Caries Clavicularum*, cum Ulceribus malignis ac sordidis, Cauterio castigandis. Exemplum vide apud *Hildanum*, *Cent. 5. Obs. Chir. 95. Articulorum Luxatio spuria*, ob vincula eorum à pravorum humorum decubitu relaxata. Vel planè *Exulceratio Articulorum*, & ei superveniens *Hydarschosis*, h. e. Muci articularis, formâ Saniei serosæ, effluxus, ob læsas simul partes nerveas. Quod pathema *Paracelso* (nescio unde;) *Synovia*; à Chirurgis verò in genere, *das Glibde Wasser* / dicitur; & videtur ferè idem esse, quod *Celsus lib. 5. c. 26. Meliceram* vocat.

IV. *Ossium Brachii Corruptio*, antequam Ulcus in mollibus patefeat (in lue confirmatâ) *Ossisve Femoris Mollities & Flexilitas*; quippe jam citatus *Riolanus lib. d. c. 3. p. 420.* similiter *Flexilis Ossis*, quasi Cornu, meminit. Nec non *Caries Tibiarum*.

V. Denique inter *Symptomata*, præter insignem *Lassitudinem Corporis*, quæ ὀστενόπῳ, (tanquam Ossæaria) *Galeno* dicitur & *Sensum Gravitatis*; quis utcunque Veneres de *Dolore* aliquo partium non queritur, profundo aut superficiali? acuto gravativo: lancinante, tensivo? fixo, vago? clamoso, tolerabili? diurno, aut præcipuè nocturno?



sturno : domabili, desperato ? ut ægri sine fulcris non possint incedere; à materiâ acri, circum perioſtea collectâ ? Aut ſigillatim *Dolore Capitis*, initio vago; inque Capite modò, modò in Musculis, Artubus, &c. mox conſtante, & (circa Noctem præſertim) periodico; aut Extenſivo Pericranii; ut alicui videantur Capilli ſibimet quaſi erigi. Sequitur *Dolor Clavicularum*; *Dolor Streni* preſſivus, vel etiam acutus; utrinque cum vel ſine Ulcere: quod pro Luis itidem ſigno certiffimo habetur. *Sensus. Frigoris in Spinâ, Dolor Scapularum: Lumborum*; (in Lue mox confirmandâ) *Coxendicum*; ut *Ischiadicus*. Cui ſi Extenuatio Corporis accedat, *Forestus* lib. 32. ad Obſ. 4. Luem exinde putat concludendam. Sed hæc ex parte, niſi abundantur Signa quædam alia, Autor videtur juſto rigidior. *Dolor Offis Pubis* graviffimus, ut æger nec rectè incedere, nec ſtare poſſit; quod accidiffe cuidam, à diuturniore geſtatione Cinguli Veneræ contra Scabiem, ut Febris etiam ſuperveniret, & ſopor quidam, aſſertur Anno II. *Ephemerid. Curioſ. German. Obſ. 35. Dolores Articulorum & Artuum* (præcipuè in Internodiis, nec non Medietate illorum) nocturni, Vagi primùm, hinc conſtantiores. *Dolores Humeri; Brachiorum; Tibiarum* in parte anteriore, &c.

VI. De quibus omnibus, hucusque enumeratis, conſtitutum primò erat, integram Diſſertationem placido Eruditorum Examini ſiſtere. Verùm Amplitudo Materiæ juſſit nos Retractui canere. Et ſaltem id unum elegimus, ut, quia *Curatio per Mercurium*, ultimo tandem in Luis Veneræ caſibus plerisque difficilioribus requiritur; quænam de eâ teneri, aut circa eandem vitari, vitandi periculi ergò, conveniat, perſpicuum reddamus.

CAP.



## CAP. III.

### *De Medicamentis Mercurialibus Externis, contra Luem Veneream, in genere.*

#### THES. I.

**A**D *Inunctiones Mercuriales* ergò, *Armillas, Cingula, Suffitus* &c. quod attinet; quæ ad curandam aut mitigandam Luem Veneris adhiberi solent; nomen suum à celebri illo Minerali, *Mercurio*, acceperunt; qui nitenti Argento, & Aquæ fluenti similis (non madefaciens tamen manus) proximam ac primam post Metallorum Solem (*Aurum*) in totâ rerum Naturâ Gravitatis sedem obtinet, Metallis reliquis, Lapidibus, Vitro, ipsi supernatantibus; Metallorum, hinc inde corrosor ac helluo, quoad Tactum frigidus, ex viscidâ aut tenaci constans materiâ Metallicâ, par Syncrisin factam Particularum incurvarum aut repandarum, facillimè in se conglobabilium: quarum Textura, resoluta in fumum, aut plusculis modis aliis ad discontinuationem sui acta, mox mox redit in se, inque *Globulos pristinos* mobiles, aut Fluorem Argenteum ita rediens, videtur non injuriâ vel Phœnicis Metallici vel Protei titulum promereri.

II, Quod Minerale quidem, cur Mercurius nominetur, nullius opinionem faciam meam: An nimirum à *Planetico* Globô, qui Soli proximus, ingenia Mathematicorum torisit? aut à celebri magis, quàm clarè, vel eodem modo ab Autoribus descripto Principio Hypostatico, quod cum Sulfure & Sale, Ternarium numerum Principi-



piorum Chimicorum, vulgò dictorum, constituere dicitur; vel planè à Prisco *Hermete* Græcis; Latinis *Mercurio* vocato, (Trismegisto etiam, vel Termaximo aliàs, ob magnam sapientiam) cui à Phœnicibus, Græcis, & Romanis divinus honor habitus est & hodierni Paracelsistæ præprimis, Tabula in Smaragdinam, velut indicem Arcani Operis philosophici, adscribunt.

III. Hoc verò certum est, quàm famosum communiter Minerale dictum habetur, propter assignatam sibi, tam Homini, ejusque Nervoso generi, quàm Insectis, Pediculis, Lumbricis, ac Vermium quibuscunque generibus aliis, lethiferam, ac venenosam vim: tam Salutarem contra Idem deprehendi, & specialem quasi Venereæ Luis Antidotum: & nullatenus attentionem mereri, quod *Veslingius* (parænes. 2. ad Rem Herb. p. 76.) Phrasi ex *Plinio* (lib. 33, c. 6) clàm-desumptà, *Vomicam eterni liquoris & rerum omnium Venum*; aut alii ex *Kunrath*, (Confes. d. Chao, pag. 15.) Hydrargyrum, quasi *Urg-genung*/appellant: si modò circumspiciè adhibeatur, ut paulò post bibendum veniet: Siquidem Usus rei ob Abusum, & damna inde emergentia, non est tollendus. Germanicè *Queck-Silber*/ quasi Argentum valde mobile. *Quicken* enim, ut notat *Vossius* in Etymologico, Belgis idem est, ac motitare. Unde Molacilla iisdem *Quick-steert* dicitur, Avis vulgò notissima.

IV. Nec non *Cinnabaris*, uti Mercuriâlis naturæ ac Virium est; sic in curatione ejusdem morbi, cum observandis Cautelis iisdem, inferius proponendis ingratiam excitandi Sudoris ac Salivationis, usurpatur. Convenientiæque ratio est hæc: *Mercurius Mineralis* currens emergit dupliciter; vel spontè, in Metallifodinis; vel per Hominum industriam.

V. Spon-



V. *Sponte emergens*, ex eo ipso *Vivus* na<sup>7</sup> ἐξοχὴν dicitur, quia, velut Aquæ vivæ fons, ex fissuris Venarum metallicarum profluit passim in foveas, & in subterraneas excavatas rupes sudat, ut manibus, vel vasculis commodis exhauriri possit.

VI. Imò *Ligni Mercurialis*, h.e. in poris suis undique guttulis Mercurialibus per naturam repleti, & extrinsecus proin tanquam Rore Argenteo conspersi, oblongi, & fere paralleli, Frustulum (rarissimi commatis rem) in scriniis suis servat *Disputationis Dn. Praeses*, dono acceptum à *Doctissimo* quodam *Materiar. Hamburgensi*, & abscissum ex frusto majore quodam, quod in *Gazophilacium Sereniss. Electoris Brandenburgensis*, recens translatum est; Abiegnum, ut videtur: Aquæ tamen intra pelvim injectum, statim fundum petit, cum hac differentiâ:



Si Extremitas A prius immergatur, Lignum simplici motu deorsum fertur. Si vero Extremitatem B. prius immergas; hæc ad superficiem Aquæ potius retro paulum agitur, ut modò dicta extremitas A. præcedat. Ex quo colligitur, præterquam quod præsentia Mercurii inhaerentis visui statim conspicua est, gravitatem Ligni ab illou-tique, non propriâ Ligni soliditate ulla esse, ut cæteroquin Lignum Ebenum, aliaque Indiæ occidentalis Ligna compaciore ad fundum statim proruunt. Ut de Mercurio Metallorum ac Antimonii, ex quibus is difficulter secer-nitur; de *Mercurio* item *Silicis* cujusdam in littore Kiliensi,



*Et vel Aura ipsius, Terram ambientis, ex mente Dn. Præsidis, alio tempore ab ipso declaranda, vel Mercurio Craniorum nil addam. quin hæc obiter.*

VII. *Mercurius currens, Hominum industriâ redditus, interim est, qui destillatione descensoriâ communiter fit, ponendo circa ollam, Ignem, ut Mercurius Terrâ vel Glebâ suâ Lapidescente rubrâ, gravi, sulfureâ, in cujus Poris antea pendulus hæserat, depluat. Imò sine Igne facile separatus est Mercurius ille Virgineus, cujus specimen D. Sachsio ex Hungariâ à D. Joh. Paterson transmissum, solâ Terrâ contusâ, & Aquâ dilutâ, statim confluit, ut legimus in Anno 11. Ephemerid. Curios. German. obs. 28. p. 56.*

IX. Aque vulgari Minerâ istâ antequam per destillationem separetur, junctim cum ipsâ Cinnabaris vocabulo Indico, ut *Plinius* putat, aut rectius Græco, *κιννάβαρις*, dicitur. Intellige *Nativam*, cum etiam detur *Factitia*; eaque duplex: Vulgaris, ex sulfure & Mercurio sublimatis orta: & Antimonialis, quæ in purificando sanguine magnè æstimata, ingreditur Pulverem Specificum Cephalicum D. Joh. Michaëlis, Chimiatri quondam Lipsiensis Clarissimi: Ad cujus imitationem, nisi sit Pulvis idem, existit similis alius Hamburgi, Autore D. Paul. Marqu. Slegelio. Et utriusque compositio videtur à Cratone, trium Imperatorum Medico, fluxisse: qui verò à Chemicis Medicamentis plus justò interdum sibi metuens, Cinnabari Antimoniali, aut Factitiæ cuivis, Nativam præferre maluit: cum quo, & *Sennerto*, etiam facit *Schönbornerus*, (Manual. Med. pag. 7.)

IX. Notandum præterea hoc, *Cinnabarim Nativam*. de quâ cum primis hic loquimur, haberi ab Aliquibus, pro  
*Minio*



*Minio Antiquorum*, distincto à *Minio* hodie cognito. Quæ differentiæ ratio etiam est breviter addenda : ne scilicet cuipiam, Mercurialia Pharmaca adhibituro, in expugnanda Lue Venerea, errandi occasio relinquatur.

X. Distinguitur nempe *Minium* itidem, ut *Cinnabaris* modò, in *Nativum* & *Factitium*.

XI. *Minium Nativum* vel propriè tale dicitur, vel impropriè.

XII. *Propriè dictum*, Germanicè *Quecksilber-Erk* est ipsamet modò descripta *Nativa Cinnabaris* : aut *Minium Dioscoridis* (sic scribentis, citante *Aldrovando* Mus. Metall. lib. 4. cap. 20. *Argentum Vivum fit ex Minio, quod abusive Cinnabaris dicitur* :) ac reperitur in Fodinis quibusdam Germaniæ, & alibi. *Vitruvius*, citante *Encelio* lib. 2. de Re Metall. c. 24. Anthracem (à Rubedine flammea) appellat, Germanicè *Berg-Zinober* ; quod resolutum, fit *Argentum Vivum*, Terra, ac Sulfur.

XIII. *Impropriè* *Minii* titulum *Sandaraca* sibi vindicat. Imò nova iterum hic *Equivocatio* emergit. Nam duplex *Sandaraca* habetur : *Arabum*, hoc est, Gummi Juniperium ; Vernix sicca aliàs ; quæ oleo Lini in liquidam dissolvi solet : & *Sandaraca Græcorum*, vel *Auripigmentum*.

XIV. Et hoc iterum non qualecunque ; quia habetur in officinis triplex : *CrySTALLINUM* vel *Album*, *Arsenicum* κατ' ἐξοχήν : *Citrinum* vel *Flavum*, *Auripigmentum* κατ' ἐξοχήν, pictoribus familiare ; Et *Rubrum*, vel *Sandaracha*, coloris respectu dictum etiam *Minium*.

XV. Imò *Minium Nativum Antiquitus* habitum fuisse vel pro sanguine Draconis à Terra absorpto , confusoque cum sanguine Elefantorum morientium ; vel pro Succo aut lacryma plantæ cujuspian , quæ hodiernum San-



guis Draconis, à Colore rubello, dicitur ; ex Scriptis Antiquorum patet.

XVI. *Minium* verò *Factitium* vel pollet parte Mercuriali, vel non. *Istud* ex Argento Vivo & Sulfure conficitur, dictum, ut antea, *Cinnabaris Vulgaris* : *Gemein Zinnober* : *Hoc* ex Plumbo calcinato conficitur, diciturque Germ. *Menning* / *Sandyx Fuchsio* lib. I. de composit. Med. p. 93. creberrimi usus penes Chirurgos, in Cura Ulcerum.

XVII. Quibus distinctè notatis jam paulò tutius, ac Veteres, poterimus quaecunque, inter Syrtes Æquivocationum, Naufragium vitare ; & Usus antivenereum Hydrargyri, tam extra Mineram, vel nudi, quàm in Minera sua contenti, vel *Cinnabaris Nativæ*, aut *Minii veterum*, declarare.

## CAP. IV.

### De Usu Externo Mercurii crudi, in Lue Venerea, per Inunctiones ac Suffitus.

#### THES. I.

**A**Tque sic, ad Usus *Mercurii currentis* in Lue Venusta, primum quod attinet ; adhibetur ille vel planè crudus, & prout à Materiariis venditur ; vel quatenus ante sui Usus, qualemunque mutationem, vel præparationem medicam in Pharmacopolio est perpeffus.

II. *Plane crudus* porrò duplici modo usurpatur: vel *Formâ suâ Globulari* aut guttatâ (si ita loqui liceat) ; vel in *Fumum* subtilem resolutus : cujus Atomî tamen, hinc inde sibi invicem factæ obviæ , ratione figuræ suæ incurvæ & na-



& naturæ purissimæ, Ætheri similes, facillimè iterum coeunt, & in priores *Globulos* redeundo, communiter *Reviscere* dicuntur.

III. Ist hac *Formâ Globulari* verò quia nimium lubricus Mercurius & inconstans est, aliquod Viscidum requirit, in quo velut captus, diligenti agitatione per illud in minimas guttulas resolvatur, & sic, ut vulgò loquimur, mortificetur & extinguatur; ut ad Rorem istiusmodi subtilem Argenteum redactus, & externè variis modis applicitus Corpori, eò felicius per poros ejus se insinuare possit.

IV. Hujusmodi *Corpora Viscida*, quæ ad Exinctionem Mercurii eliguntur, imprimis aut ad summum, sunt duo hæc: *Saliva Hominis*; & *Res Pingues*. Godofr. Stegbius lib. 7. Med. Pract. cap. 9. pag. 346. mentionem facit etiam, pro scopo hoc, *Succi Citri*. Alii *Succum Rosarum*, pro Pilulis Barbarossæ, adhibent; quarum descriptionem vide apud *Forest.* lib. 32. obs. 19. qui alteribi etiam *Succum Limonum* adhibet. Hic verò de jam-dictis duobus prioribus, tanquam usitatoribus, præcipuè agemus.

V. Ad *Hominis* itaque (præsertim Jejuni) *Salivam*, quod attinet; certissimum quidem est, eam tam ratione Viscositatis, quàm inhaerentis simul cujuspiam Acidi, ad discontinuationem Mercurii non leve quid conferre. Merito tamen in Confectione Emplastri *Vigonis* de Ranis cum Mercurio, à *Zwelffero* in Notis ad Augustanam, rejicitur, utpote res minus munda. Ibi enim, juxta Formulam, ad Mercurii Uncias quatuor, una ac altera libra Salivæ vix sufficeret; ut Emplastrificina talismodi sputanda & insuper habenda potius sit, quàm ampliùs tentanda.

VI. Et præstat illius loco accipere *Pinguia, Axungiam*



putà *Humanam* ; aut *Porcinam*, quæ veluti basis est horum Unguinum, vi relaxandi, & emolliendi prædita ; assumenda recens, non salita, aut liquata, & à Membranis liberata : Vel *Axungiam*, *Ursi*, *Gallina*, *Anseris*, dolentibus partibus congruam : *Serpentum* item aut *Viperinam* : aut plane *Rotarum* veterem , nisi potiùs hæc Agyrtis relinquenda sit. *Butyrum* porrò, quod itidem Dolores lenit, papulas digerit, & Mercurium fortiùs retinet : *Olea* variis generis & virtutum ; *Terebinthinam*, quæ validè itidem digerit, dolores sedat, & Fumum eximium exhibet.

VII. *Proportio Mercurii*, talismodi Pinguibus miscendi, solet esse  $\frac{1}{8}$   $\frac{1}{6}$   $\frac{1}{4}$  imò  $\frac{1}{3}$  plus minùs, pro ætate, & viribus Ægri, Morbique vehementiâ. Laudatque *Forestus* lib. d. Schol. ad Obs. 13. *Unguentum* quoddam, *Cælestinum* ab Insulanis dictum, quod illi creberrimè adhibuerint in omni Lue Venerea, ac Scabie ; constans ex Mercurii vivi libra j. & *Pingued. Calceariorum* Libris ij.

VIII. Ac talismodi Linimentorum Genere, invento à *Carpo*, Cutis Ægri inungitur, vel ita simpliciter, *Forma Unguenti*, *Cinguli*, *Armilla* ; vel *Forma cultioris Unguenti* aut *Emplastrum*.

IX. *Unguenta* aut *Emplastra Mercurialia* fieri solent tali pacto : Adduntur in *Mortario* Mercurio in Pinguibus mortificato, variæ aliæ res, quæ vel Malignitati morbi resistunt ; vel *Ulcera* detergunt, ac mundificant ; vel *Virus Mercurii* creditum infringunt ; vel peccantem *Materiam* quovis meliore modo corrigunt ; vel dolores utcunque leniunt ; vel *Nervos* roborant ; vel ad odoris castigationem faciunt, (nisi sint *Adstringentia*, actionemque præcipuam retardent, sudoremque impediant) vel *Medicamento* justam formam ac consistentiam tribuunt ; juxta Effatum



rum Doctissimi Scriptoris Itali, *Matth. Amidei* (de Confectione Hyacinth. Giornat. 30. pag. 341.) quanquam ibidem præsertim de Cerotis loquatur: *Chi sà ben cerottare, ogni altra cosa sà ben fare.*

X. Quia verò tam inter Simplicia, quàm Composita, haut pauca ejus commatis sunt, ut unum eorum interdum duabus vel pluribus Indicationibus satisfaciat: itaque brevitatis ergò aliquot tantum eorum nomina profereamus. Et sunt e. gr. *Theriaca*, (quam tamen *Rondeletius*, tanquam ad Suffitus ineptam, alicubi reprobatur:) *Mithridatium*: *Vitellus Ovi*: *Oleum Amygdalarum dulcium*, *Liliorum Alborum*, *Lumbricorum*, *Juniperi*, *Salviæ*, *Lauri*: *Nux Moschata*, *Lacryma Resinosa*, (quæ odoratam fuliginem multam excitant) e. g. *Benzoe*, *Storax*, *Mastix*, *Myrrha*, *Thus*, (*Ladanum*, cum Moscho, *Cinnamomo*, *Forestus* lib. de Schol. ad obs. 17. tanquam Astringentia, exesse vult à Suffitibus: quodammodo Sui oblitus, quod paulò superius, Schol. ad Obs. 12. scripserat, Unguento nos apponere, *Lithargyrum*, etiamsi aliquà ex parte sudores supprimat.) *Camphora*. Vel *Ligna Resinosa*, ut *Aloës*; *Ramenta Juniperi*; *Cortex Pini* &c. Aut denique *Pulvis Rorismarini*, *Corticum Citri*, *Salviæ*, *Caryophyllorum*, &c.

XI. Aut, si verendum esset, ne quidam ex memoratis Pulveribus justò duriores, suaque asperitate, consistentiæ teneræ Unguenti, vel Emplastri tantum-obfuturi essent: præstabit, talia in Pinguibus, ad debitam consistentiam antea coquere, & ad Emplastri formam, apta reddere, ut ante dictus *Zwelfferus* in Emplastro de Ranis observandum monet. Imò Unguenta jam pro usu parata quæpiam, e. gr. *Aregon*, *Martiatum* &c. addi vel adhiberi possunt ab eo, cui arrident Decomposita.



XII. *Cingulum Mercuriale, Zonas, Armillas*, Audacia ut plurimum Chirurgorum quorundam & Empiricorum, excogitavit, ut per curationem brevi-absolutam, tam Luis Venerea, quàm Scabiei & Pediculorum creditam, Sibi-met Decus, Loculo solatium pararent. Quo successu verò id fieri soleat, præter Eperientiam quotidianam, consulatur *Hildanus Cent. 5. Obs. Chir. 93. Annus II. Ephemerid. Curios. Germania, Obs. 25.* & ea, quæ sparsim inferiùs, in recensione Symptomatum & Morborum, Salivationem præcedentium concomitantiumque, Salivatione pejorum, adducentur.

XIII. Iſtasque *Zonas* aut *Cingula* tali arte conficiunt: Latitudine circiter duorum digitorum transversorum, plus minùs, Telam panni assumunt, cui *Mercurium* crudum, in Axungia porcina, aut quavis alia re, extinctum illinunt, nudoque Corpori applicant; vel Brachiis forma *Armilla* aptant.

XIV. Per *Suffitum* vel *Vaporationem* verò *Mercurius* vel *Cinnabaris* eò magis comminuitur, & aptior redditur, per Poros corporis intrare. Imò vix evitari penitus potest, quo minus aliquid per Os ac Nares in ipsos Pulmones transeat. Unde administratio ea tantò periculosior est, raroque & nisi urgente necessitate, velut extremum remedium, permittitur ad suscitandum Sudorem ac Salivationem, quia requirit Vires majores, quàm Unctio.

XV. *Formaque Medicamenti* istius convenientissimè consistit in *Trochiscis*: qui constituto ad sudandum debitâ ratione Ægro, adhibitisque reliquis adhibendis, cap. 6. enumerandis, pondere drachmarum ij. incenduntur, ut in vaporem calidum resolvantur.

XVI. *Proportio Ingredientium* est hæc, ex mente *Stegbii*



*ghii* (Med. Pr. lib. 7. cap. 9. p. 347.) Parti uni Cinnabaris adduntur duæ partes Gummatum, Resinarum, vel Aromatum; e. gr. Rec. Cynaprii drachm. vj. Styrac. calam. Benzoin. an. drachm. ij. Nucis Moschat. drachm. j. Caryophili drachm. ß. cum Terebinth. F. l. a. Trochisci. Vel Tales, quibus *Forestus* (lib. 32. obs. 17.) feliciter usus est: Rec. Cinnabar. Unc. ij. Oliban. Myrrh. Gumm. Benz. an. Unc. j. Gallia mosch. drachm. iß. Theriac. elect. Unc. ß. Styrac. liquida ad incorporandum, q. s. f. Suffitus. Imo ad fortius cooperandum (in robustioribus) aliquando adduntur Auripigmentum, Sandaracha Græcorum, Pyrites (vel Marchasita) Euphorbium. Formulas vide apud *Eundem ibidem* in fine.

XVII. *Cognata* denique Inunctioni aut Suffitui est *Ablutio*, de qua *Idem Forestus* (lib. 32. Schol. ad Obs. 16.) ex *Augenio* hæc habet: Fiunt Loturæ ex siccantibus, rarefacientibus, discutientibus, & Mercurio sublimato. His in loco calido abluuntur omnes corporis partes, exceptis Capite, Pectore, Stomacho, & sub Alis. Idque diebus 10. semel, bis, &c. Putrescunt sic etiam Gingivæ, & Salivatio succedit. Exemplum *ibi* vide. Post Ablutionem & perfrictionem Sudor in lecto procurandus, appositis juxta pedes lapidibus calentibus.

## CAP. V.

De Præparatione quadam Mercurii, in Usum Inunctionis, quid statuendum?



**C**Æterum Aliqui cautiùs acturi, minus periculi ex Salivatione imminere Ægro existimant, si scil. Mercurium Præparatiunculâ aliquâ, sigillatim *Trajectione*, *Lotione*, *Solutione*ve præsertim, aut *Coctione*, mitiorem reddiderint.

II. Sed, ut suspendam tantisper judicium, quo *Disputationis DN. Praeses* cap. ultimo, Mercurium ab omni Reatu Veneni liberare non dubitat, & omnes Læsionum Modos ex unico quodam principio, ex Hydraulicis petito, tanquam ex communi, & cum Occultis Rerum Qualitatibus nil commercii habente, Ægritudinum omnium Fonte, quæ Inunctionibus aut Suffitibus Mercurialibus superveniunt, adscribet; de *Trajectu Mercurii* per Corium, ut mox (Thes. 4.) dicetur, salva quidem res. Neque *Lotionem* ejusdem in Vino aut Aqua Theriacali, vel similibus, aut *Solutionem* in Aqua Forti, ad mentem *Zwelferi*, pro conficiendo Empl. Vigonis instituendam, magnopere improbare animus est.

III. *Coctionem* verò & *Colaturam* quod suadent aliqui, commemorante *Steghio*, loco antea d. p. 346. ingeminare ausim: *Spectatum admissi, Risum teneatis Amici*. Mercurium volunt Oxopotam reddere! Ita tamen se habet processus: Colant ipsum per Pellem Arietinam, dein coquant cum Aceto, & Herbis Nervinis &c. (e. gr. Salviæ, Rorismari, Chamæmel. Hyssop. Meliss. Caryophil. Nuc. Moschat.) & iterum per Pellem Arietinam exprimunt: denique miscent in Mortario, ut uniatur.

IV. *Trajectionem* per Pellem Arietinam utique, ut dixi, non vituperamus. Nam usu ita tritum & necessarium in Officinis est, Liquoris hujus metallici superficiem  
à Pul-



à Pulverulentis Sordibus purgare, ut remanentibus iis in Pelle, ipse per Poros undique, Jovis Aureo Imbre pulcrius, in Vas Vitreatum suppositum depluat.

V. Sed *Cōctione* istà Mercurio quid decedit? Metallo in minutissimos Rores evanido? liquidissimo? similimo sibi per omnia, ac cœlesti quodammodo Puritate prædito? demum nec Sale, nec Igne ita facile domabili, quò minus iterum reducibilis sit. Sive enim sublimes, sive præcipites, sive Aceto, aut Succis acidis aliis, ipsisque Aquis stygiis ac Chrysulcis, solvas ac dissolvas, nedum aliud facile quid, nisi Fluor Argenteus superest; & perniciosior quidem ita videtur, atque Veneni particeps: sed hoc Acido Corrosivo potius deberi, quod immoretur eidem, & altius ipsum Corpori nostro inhaerere faciat, verisimilis (post *Glauberum* *Furn. Philos. part. 2. c. 38*) est opinio *Dn. D. Joh. Nicol. Pechlini*, vocati, ut fama est, Professoris novi in hanc Academiam, in perdocto Tractatu de Purgantibus, cap. 22. p. 260. Experimentum hoc addentis p. 261. *Splendor ille, (Mercurii) qui in sublimatis Crystallis elucet, à Globulorum, Mercurialium refractione dependet, qui etiam Microscopio deprehendi possunt.* Et, siquidem *Schotto* (*Phyfic. curios. lib. 4. p. 251.*) credimus, *Mercurius*, Aquâ stygiâ communi, sed optimâ, solutus, veruntamen *per Ampullæ vitreæ poros transfudavit.*

VI. Ex quibus conjectu facile est, de Observatione *Hildani* (*Cent. 5. Obs. 94.*) quid statuendum, qui ope Mercurii præcipitati *Ægræ* cujuscumque Abscessum apertum abdominis mundificaturus, talem ac tantam in ea Salivationem expertus est, ut spatio Diei unius aliquot Libras pituitæ illa exspueret: Et Ulcus etiam mundatum, sanatumque fuerit. Ista tamen commotio Humorū nimis ma-



gna, & non sine periculo exstitit : & Salivatio successit casu magis, quàm consilio : Suspicioque haut vana relinquitur, illum externè-adhibitum *Mercurium* receptum in penetralia Corporis, ibique Tincturis Viscerum, per varias digestionem, & Sanguinis Circulationibus subjectum, facili negotio dein in eodem corpore Ægræ, ut Mercurius alteri ex Mamma Cancrofa stillans, de qua vide *Th Bartholinum* Cent. 1. hist. Anat. 7. revivixisse.

VII. Superest *Comminutio* Mercurii alia, eaque, (sicca via incedens) omnium exactissima, facta successivè in manu Aurifabri, deaurata pocula panno vel linteo extergentis. Cujusmodi Linteamina sicut Scabiei, Tineis & Pediculis Capitis abigendis, congruunt ; Ita Veneris malle non minùs mederi posse, (observatis observandis) facile cuivis est in aprico.

## CAP. VI.

Quibus, Quando, Quoties, & quo Ordine conveniat, Inunctiones aut Suffitus Mercuriales adhibere ?

### THES. I.

JAmque ordo poscit quàm maximè, ut *Quibus, Quando, Quoties, & Quo Ordine* Inunctiones, vel alia Mercurialia Externa, administranda sint, distinctim proferatur : Verumque Usus Hydrargyri & Cinnabaris eò clariùs ob oculos ponendo, cuivis periculo, quantum possibile, præcaveamus ; quia, nisi cautè illò utaris, plurimum damni in-



inde exoritur, cum ne peritissimi etiam Medici ac Chirur-  
gi, Ægrum prorsus immunem ab omni incommodo pos-  
sint reddere ; quin varia Mala Hydrargyrosin ordinariè  
quasi circumstant, & Salivationi complicantur.

II. Primum itaque : *Quibus* tale quid conveniat,  
aut non conveniat? Non sine discrimine cuius Sexui, Æ-  
tati, ac Statui præstandum esse, puto quod sit sine ulteriori  
explicatione planum. Et præcipuè illis, qui obstructâ-al-  
vô laborant, vel nimis fluidâ ; multumque emaciatis ; &  
illis, qui ad Paralyfin, vel Tremores artuum inclinant, mi-  
nùs convenit. Hæmoptoicis item, ac Peripneumoniacis ;  
quos (Suffitu) perire, non frustra *Fallopius* (d. Morb. Gall.  
c. 69.) statuit. Extra hos verò ac similes casus *Hildanus*  
(cent. 5. obs. 98.) dubitat non Gravidas etiam & Infantes  
Inunctioni submittere ; & *Botallus* d. Lue Ven. cap. 20.

III. De *Tempore* dein si quæras : An Morbi initio  
Inungere aut Suffire conveniat? Non. Vel ingravescente  
malo? Non. Vel in Statu, quo tempore morbi omnia  
vehementissima sunt, & penè desperata ; nec usu Ligni  
Guajaci vel Sancti, Sassafras ; Radicis Chinæ, Sarsaparil-  
læ, aut similibus, aliquid laude dignum potuerit effici ?  
Tum demum ad Mercuriales Suffitus, &c. tanquam Extre-  
mum Remedium, quo plurimos sanatos fuisse, constat Ex-  
perientiâ, deveniendum ; ni Vires nimum sint prostratæ.  
Suffitus enim imprimis requirunt Vires validas. *In aliis oc-  
casionibus* (inquit *Fallopius* l. d.) *Fugite hæc, ut Diabolus  
Crucem.*

IV. Jam ubi eò deventum est, manè illud fieri, saluber-  
rimum ; vel à Meridie, horis 2. aut 3. ante cœnam. *Post Cœ-  
nam* inungendum putavit *Nicolaus Massa*, apud *Forestum*,  
lib. 32. Schol. ad obs. 14. quod in Suffitibus locum habere  
nequit.



V. *Quoties? & Quamdiu?* Communiter ab audaculis *Inunctio* ultra Sextum, Nonum, Duodecimum, imò Decimum quintum diem extenditur; quem tandem Empirici non transcendunt. Faciuntque Ægrotum in suo Sudatorio unam, duas, vel tres horas morari, donec Saliva effluat. Sed intervalla biduana aut triduana ægrotis conceduntur meritò (præsertim debilioribus) ut interim Diætâ siccante, attenuante, aut quavis sibi congruâ, &c. utantur. Semel, bis, aut ter Materia Suffitûs injicitur. Ad integras tamen 2. aut 3. horas ægrum cum Vaporibus luctari, minùs consultum est. Quin potiùs à tempore brevissimo indies incipiendum, & in simili terminandum, paulo inferius, th. 15. dicetur. Ratione Intervalli jam-dicti, totus Hydrargyroscos ambitus, in tres (ternorum semper Dierum) Inunctiones, dirimitur.

VI. Interim quæ circa Hydrargyrum specialiter magis considerata sint, ad tria hæc capita reducuntur : videlicet (1) Antecedentium, (2) Eorum, quæ in ipsa administratione Inunctionis aut Suffimenti eveniant ; & (3) Quæ Bona vel Mala communiter sequantur?

VII. Ante *Suffimigium* hæc e. g. veniunt considerata. Bonam diætâ & moderationem victus rationem, semper & ubique, in principio, medio, & fine totius curationis, ordinare convenit. Hinc præparandi Humores peccantes Medicamentis convenientibus, ut Evacuationi aptiores fiant. Evacuatio verò fit partim per Iteratas blandas purgationes, quibus phlebotomia aliquando, cæteris paribus, potest succedere ; partim & aliquot diebus usu eorum, quæ Perspirationem Corporis promonent, & Viscera simul roborant ; uti celebratur Decoctum Guajaci, &c.

VIII. Qui-



VIII. Quibus aliquandiu pramissis de dum Articuli statim aut aliæ partes inungendæ; sed *Tophorum*, si qui adsunt, emollitio, digestio, per Sacculos ac Fetus convenientes, paratos e. g. ex *Radic. Alth. Malv. Herb. Scrophular. Malv. Violar. Flor. Chamamel. Melilot. Semin. Lini, Fœnigræc. Melilot. Ol. Lumbric. Lilior. alb. Amygdalar. dulc. Pinguedin. Human. Unguent. de Alth. Emplastr. d. Rannis*, solo, vel cum Gummi Elemi & Tacamahaca, in oleo amygd. dulcium solutis, misto, &c. aut illorundem etiam Resolutio, ad quam Oleum aut spiritus Tartari præcipuè commendatur; vel, si adsint *Apostemata*, ac *Ulcerasordida*, hæc probè mundificanda sunt. Ac imprimis, si aliqua suspicio sit *Offis cariosi*; illud non ita linquendum, sed eximendum prius est. Aliàs enim fermentativum aut corrosivum Luis Seminium, quantillum etiam id sit, in Carie, aut Ulcere relictum, aliisque Corpusculis involutum, nisi statim emergat, indomabiles pene agit Cuniculos, & post aliquod Tempus in Morbum eundem iterum vel pejus maturescit.

IX. Declinatis jam his ac similibus, quæ Inunctioni vel Suffitui moram injicere poterant, *Inunctio* quidem non ampliorem apparatus tantopere flagitat, quin Æger tantum, Articulos, Pedes, Genua, Carpos, Humeros, Spinam &c. bene frictus & unctus, in Lectum se conferens, Vinum Sambucinum, Aquam aut Spiritum Theriacalem, vel Essentiam aliquam C. C. aut simile sudoriferum aliquod ore capiat, beneque coopertus, ut ita sudet, per b. horium aliquot noctium, salivationem successu Temporis expectet. Vulgò Tarsum pedum primò inungunt, hinc internodium Tibiæ: dein Femora media; medias Ulnas, media Brachia: & denique totum Dorsum, benè id fricando.



Imponunt Stuppam, Lintea, aut aliud quid.

X. Vel Lecti pertusus, committi etiam potest Vaporario, ut Mercurio foris allito, per poros lubeunte, intra conclave satis munitum, Sudor per eosdem egrediatur. Sed tale Vaporarium ex Cinnabari fieri non æquè opus est; quin commodè saltem decocto rerum communiorum, vel Spiritu Vini C. C. Aquis Theriacalibus, Resinis ac rebus aliis odoriferis, facilè peragitur. Vocaturque *Suffimigium Benignum Fallopio* d. Morb. Gall. cap. 74.

XI. Ipsam palmarem verò, & graviolem, *suffitus Cinnabarini*, de quo hic maximè sermo est, *administrationem*, in Unctis vel non-Unctis exigendam feliciter, quæ porro *precedere* deceat; cum hac differentia notandum: Sive (pauperior) in *Cubiculo* quis sit vaporandus, sive intra *Habitaculum arctius*; eidem ad suffulciendas vires, unum vel duo ova sorbilia in haustulo Vini Malvatici vel generosi alterius rectè dantur. Totoque Curationis Tempore *Aer* haut facilè mutandus est, ne Perspiratio turbetur.

XII. Per *Habitaculum* verò *arctius*, intelligo *Balneum Vaporis, Laconicum*, (quod Lacones eo, ad cruditates consumendas, crebriùs uterentur) dictum; olim prima Balneorum cella, in qua *sicco Calore* sudorem Romani provocabant: quod *Celso* lib. 3. cap. 27. membr. 3. *Sudatio assa* dicitur, Nervorum Tremoribus inimica; *Vitruvio* Caldarium; de quibus fusiùs agit *Mercurialis*, Art. gymnast. lib. 1. cap. 10. & apud *Heurnium* (Method. ad prax. lib. 1. p. 32) juxta diversitatem Vaporis, in Siccum & Humidum distinguitur. Hodie verò, ratione structuræ, dirimitur in *Cupdam & Arcam*.

XIII. *Cupa*, vel *Cuppa* (Vas Vinarium propriè) ab *Heurnio* (l. d.) *forma sessili* aut *Tonna Ovalis*, perpendiculariter



riter cavæ, fundi duplicis, depingitur: & ita superioribus Annis adhibita est: Sed quia Vaporem, præsertim humidum, nonnisi per ambages quasdam fistulæ, licet immittere; *formâ erectâ* hodie à Chirurgis usitatâ, antrorsum apertili, paulò convenientior est, quia per foramina asseris, cui insistat aut insideat æger, Vapor directè magis adigi potest, & subtus, per laterale quoddam Foramen aliud, ingeri Materia concremanda.

XIV. *Arcula* verò quadrata & erecta, peculiariter ad opus id ex asseribus extructa à Scriniario (*Schwiß-Kasten*) omnium denique optima est, cujus iconem æri incisam vide sis apud *Glauberum*, Furn. Phil. part. 3. c. 34.

XV. Quicquid sit: Utrobique *Æger nudus* in Sudatorium talismodi, asseribus, operculis, aut linteis mox bene claudendum, locatur, ut sedeat ibi, ac sudet. Pedibus verò subest Tabula Ligneæ perforata, per quam Vapor asfurgere, totumque corpus ambire possit, *sensim primò*, nec multum ultra quadrantem horæ aut semihorulam; hinc longiùs crebriusque, quoad magis magisque indies adsuescat: hinc gradatim, sub finem Curationis, ad horulam iterum redeat. Veruntamen *Os* ac *Nares* sunt bene muniendæ, ne Vapor illas subeat. Quapropter *Caput* quidem potest extra Cistam, vel Laconicum quodvis aliud, e-vehi; sed oportet Collum & humeros, ope Lintheaminum, probè munire.

XVI. Hinc *Administratio ipsa* sequitur: Testa cum Sicilibus aut Lateribus Ignitis, Vivisve Carbonibus; vel Craticula cum Lamina crassa Ferri candentis, supponitur, eique res vaporabiles immittuntur, *formâ Trochiscorum*, ut superiùs dictum est, vel Pilularum majorum, aut crassiusculi Pulveris.

XVI. Pro-



XVII. *Promovendi Sudoris* ergò convenientia intròsumi possunt Pharmaca. *Deliquium animi* si incidat, ventilandus est vapor Balnei, reserando moderatè rimam vel aperturam Balnei unam aut alteram ; Ægerque Pane, qui Vinò Malvatico intinctus sit, vel Sorbili Vinoso, vel Rotulis Manus Christi Perlatis, &c. paulùm reficiatur.

XVIII. Ac ne *Mora Mercurio concedatur in Corpore*, justò diuturnior, quin Ptyalismus vel Salivatio promoveatur ; Patiens partim *Nummum Aureum* in Os (vel Globulum similem insuper in Nares) recipiat, ut erumpens ex ductibus Salivalibus Mercurius, vi sympathias, argenteus reddatur : partim *Pulverem Cordialem, Auri Foliatum* mixturâ ditatum absorbeat, ut etiam in Intestinis se idem Minerale Auro associet, inque Amalgama cum ipso redactum, gravitate suâ Intestinales fibras, ad Sui evacuationem concitet. Idque eò magis, si Salivatio fortè non procedat ; at Alvus moveatur. Quod denotat, Mercurium ad Pancreas magis, quàm Glandulas Palatinas aut Maxillares conversum esse. Sique Tubercula simul & Dolores remittant (præsupposito, quod sudor sufficiens durante Hydrargyrosi successerit) id tantò melius censetur.

XIX. Cumque jam imminet *Tempus Salivationis*, Gingivæ (imò Lingua) incipiunt Tumesceri ; eadem dein, ac Fauces exulcerari ; & ita Saliva demùm profluere ex Tonsillis, & proximis glandulis, ac salivalibus earum Ductibus, notabili copiâ ; imò tanta interdum, ut Ægri vix tantum possint expuere ; & Vir quidam post Inunctiones non rarò ad libras ij vel iij singulis diebus, usque ad decimum octavum expuerit, *Hildano* referente, Cent. 5. obs. Chirurg. 96.

XX. *Ratio, cur Mercurius magis ad Salivales, quàm alias*



lias Glandulas feratur, & ut ait *Fallopious* d. Morb. Gall. c. 76. p. 43. a. *veluti Avis volet ad Palatum*; videtur non tam Acido cuiuspiam fermentali soli, cui Mercurius se implicet, (id enim in quibusvis Visceribus aliis possit fieri) adscribendum esse, quàm Viscosis præterea ejusdem salivalis humoris partibus, quæ Mercurium tantò longiùs detinent, & suppetente continuò Seri Copiâ, Salivam uberiores præbent, nec priùs desinunt, quin ipsa fermenti istius anomali major pars, expellatur funditus cum contagio Mercuriali, ipseque Auro foris appposito, amicè provocetur.

XXI. *Quibus peractis* Patiens in lectum calidum lecto inferiori involutus, quod Succino, Lavendulâ, Styriace, baccis Juniperi, & similibus, fumigetur, imponitur: per duas circiter horas sudat; & postea, Sudore perfectò, ac bene-absterfo, Faucibusque Lacte tepido, vel Decocto aut Aqua Plantaginis, Prunellæ, Rosarum, &c. (mitigandæ inflammationis & exulcerationis ergò) addendo Rob Diamoron, Mel Rosarum &c. Cibo e. g. Contuso ex Carnibus delicatis, Jusculis restaurantibus, Potuque reficiendus est, vel Vini generosi, tenuis; aut Sassafrati, Enulati, Melissati, Borruginati, Citrati, &c. vel loco ejus Mulsæ, Decocti C. C. Eboris, &c. Finisque sic imponitur Suffimentis.

XXII. Et cavendum, ne pristina sua, meritò suspecta, *Vestimenta*, Ager iterum induat, nisi Sapone priùs Lixiviove bene lota & purgata. Et hucusque de *Suffitibus extra Lectum*.

XXIII. Pro *Debilibus* verò *Vaporations* potiùs fiunt *intra Lectum*, deducendo Vaporem ex sede Carbonum per Fistulam ferream aut cupream intra Stragula, pedibusque commodè lateres calidos supponendo; præcunte



nobis sæpe-laudato *Foreſto*, lib. 32. Schol. ad Obſ. 17. Quod ſi ne ſic quidem etiam *Ægri* Fumum facilè perferant; ex-ferant, licet, Caput leniter foras, ſed Collum ipſorum op-timè Linteis obvolvatur.

## CAP. VII.

# De Abusu & Noxa dictorum Me- dicamentorum Mercurialium.

### THES. I.

**Q**uoniam verò, ut Cap. 6. th. i. dictum eſt, ne peritiſſimi quidem Medici evitare omnimodè poſſunt omnes cir-ca Salivationis negotium *Ægri* tudines, (quid dicam de Accidentibus illis, quæ ſive culpâ ægroti, ſive adſtantium, & circumſtantiarum quarundam exterius, ſe implicant, ut Saluberrima quamvis intentio veruntamen citra votum haud æquè cadat?) ideoque non incommodum mihi vi-detur, poſtquam verum Uſum Externum Medicamento-rum Mercurialium deſcripſi, ut Morbos quoque ac Sym-ptomata, Unctis vel Vaporatis ſupervenientia pleraque in medium adducam.

II. Suntque eadem, ut Mala ipſius *Luis Venuſta*, mul-tiplicia itidem; imò quandoque ipſa *Mors*, Curationi ſu-ſceptæ funeſtum terminum interponens. Cujus rei exem-plum enorme, poſt intempèſtivè factam, Illuſtriſſimo cui-dam Hypochondriaco, Inunctionem Mercurii, prolixè re-cenſitum vide *Anno I. Ephemer. Curioſ. Germ.* obſ. 80.

III. Ad ſummum verò, *Ægri* tudines, quæ Inunctio-ni, Suffitui, & Salivationi Mercuriali implicantur, ad hæc duo Capita reducuntur, ut aliæ videl. earum Salivatoribus iſtis



istis frequentes & ordinariæ quasi sint, e. gr. Palati inflammatio & exulceratio, tumor ac Dolor Linguae, deglutitio læsa, Vacillatio & sordities dentium : aliæ rariùs supervenientes. At nos hoc loco utrarumque Essentiales differentias hic maximè sequemur.

IV. Primùm itaque ad *Morbos* tam Solidarum, quàm Fluidarum partium, pertinent e. g. hi : *Intemperies* aucta passim : *Inflammatio* alicubi, tam ab assumpto foris Mercurio, quàm intùs (præcipitato, aut sublimato) planeque *Gangrena* : quippe hujus initium, ab Unguento Mercuriali in Arthritide, *Hildanus* (cent. 4. obs. Chirurg. 82.) notavit : vel minimò *Fætor*, aut *Decoloratio Corporis* in Plumbeum Livorem, si Sudores non satis eruperint, aut deterfi sint : *Marasmus* : aut *Excoriationes* passim in Faucibus, Collo, Auribus, Inguine ; quales intempestivam Pueri cujusdam Inunctionem sequutas, recenset *Idem* Cent. 5. obs. Chir. 92.

V. Ac specialiter magis ; *Tumor Capitis nimius*, in puero itidem exortus, post inunctionem Mercurii, sine causa factam à quodam audaci Empirico, referente Eodem. l. d. Vel *Laxitas Cranii nimia* ; prout ex Suturis Cranii Nobilis cujusdam post mortem exsudasse Mercurium, idque annotatum esse in Anglia à quodam *Anonymo* in MS. refert *Disputationis DN. Præses*. Aliaque ejus rei exempla citata vide in *Ann. I. Ephem. Curios. Germ. Schol.* ad Obs. 81. *Facies intorta. Inflatio, & Inflammatio Faucium; Fætor Oris: Exulceratio, aut Excoriatio ejusdem : Exulceratio Gingivarum : Dentium Sordities, Vacillatio, Corruptio, aut Lapsus. Linguae Tumor*, quandoque planè enormis, cum periculo Gangrænæ, aut Suffocationis. *Colli Scrophule ac Nodi*. Neque aliundè Strumas Carinthiorum, inque Styriâ, ac circa Alpes, quàm ab Aquis Mercurialibus præcipuè, rectè deducit



*Jonstonus*, in *Idea Med. Pr. alii*que. *Colli distortio* (ab Unguento Mercuriali) apud *Th. Bartholinum*, cent. 4. *Hist. Anat.* 48. quæ est de Muliere quadam Hiberna. *Phthisis*, si Mercurius ad Pulmones feratur; vel *Hydrops*, si ad Hepar; ex communi Sententia. *Renum*, ac inde *Urinæ Obstructio*, si ad Renes: *Ulceræ Pudendorum*. *Gummata Tibiarum*, de quibus hæc refert *Fallopianus*, de *Morb. Gall.* cap. 76. Ego reperi Homines inunctos per Triennium antè, & venientibus gummatis in *Tiblis* detecto osse vidi collectum ibi argentum vivum. *Artuum contractura*: & *Nervorum retractio* (ex Fumo *Cinnabaris*) exemplo cujusdam viri egregii, in oris *Septentrionalibus*, qui alicubi sibi factum esse, *Dn. Præsidi* noviter questus est; vel *Rima Exulceratæ Manuum ac Pedum*, cum *Pruritu*.

VI. *Catarrhi* porrò à Capite (ut vulgò dicuntur,) delabentes; qualis fuit ille, delapsus in Sinistrum Corporis latus, accedente dolore, & impotentia totius lateris, à Cingulo Venereo, contra Scabiem Lumbis applicato, cujus mentionem facit *Hildanius* Cent. 5. *Obs. Chir.* 93. *Defluxio ad Oculos* adeò acris & copiosa, in eodem Puero, qui Lue non infectus, tamen imperitè inunctus fuerat, ut Visum sinistri oculis amiserit; imò oculus uterque protuberaret, ut ille nil posset discernere, autore eodem, Cent. 5. *obs.* 92.

VII. Ac *Symptomata* denique hæc sunt notatu digna: *Virium magna plerumque prostratio*, aut *Oppressio*: *Suffocationis* periculum. *Syncope*, cum *Sudoribus frigidis*. *Sensuum Lesiones* à Fumo, si Æger in Vaporario circa Collum, Aures, ac Faciem non benè coopertus sit. In specie, *Visus læsio*, (ab eodem.) Aut planè *Amaurosis*, vel *Cæcitas* ab *Obstructione Nervorum Opticorum*, nullo Oculi vitio extrin-



trinfecus apparente. Exemplum ejus post ineptam Inunctionem Mercurialem, Matronæ cuidam factam, narrat *Hildanus* l. d. *Auditus læsio*; ita enim *Hildanus* ibidem: *Puero*, inquit, *intempestivè unctō*, qui non fuerat infectus, ex *Aure sinistra continuo*, materia copiosè exstillavit, nunc *ichorosa*, nunc *purulenta*; non-nunquam etiam *cruenta*, cum *Auditus depravatione*. *Dolores summi*; (ab Unguento simili, adhibito in *Arthritide*), monente *Eodem*, *Cent. 4. Obs. 82. Dolor aut Gravado Capitis*: *Punctura Cordis*; aut *Palpitatio*, *Aurifabris familiaris*. *Dolor Scapularum*. *Nausea*, item, (à *Cingulo Mercuriali*) adhibito contra scabiem, de quo jam ante. *Dolor Lienis*. *Stupor*: *Articulorum debilitas* (à *Fumo Mercurii*) horumve *Dolor*: *Spasmus*. *Convulsio*: *Tremor Membrorum*; aut *Paralysis* (ab eodem): mansisse-que alicui post Inunctionem *Rigidum Crus*, *Forestus*, lib. 32. obs. 15. notat. *Apoplexia* aut *Epilepsia*, juxta *Heurnium* d. Aff. capit. c. 23. Vel sæpe *Aphonia*, post Inunctionem aut *Suffumigium*, *Culpâ Linguae ac Faucium tumescentium*: *De-glutioque læsa*: &c.

VIII. Ex quibus ac similibus (verba sunt *Celeberrimi Dn. D. Th. Bartholini Cent. 4. Hist. Anat. 48.*) *Æstiment Mercurii noxas*, qui cum *Mercurio volant*: Et, si *Nervis suis velint consultum*, in eo *Nervos artis intendant*, ne *fallaci Mercurio nimium tribuant*. Pauci quippe evadunt, qui ex *Cura Mercuriali* non aliquid *Mali contrahant*; nisi valdè *robusti*, adhibitoque *perito Medico*: cujus *Peritia* si unquam, in his casibus imprimis, *Principatum obtinet*. *Ineptus Artifex cæco Militi similis*, ut habet *Botallus de Luc Ven. cap. 7.*



## CAP. VIII.

# De adductarum Ægritudinum Medelis : cum nova quadam Hypothesi Dn. Præsidis.

### THES. I.

**D**Enique operæ precium foret, enumeratis Malis convenientia quoque conferre Remedia. Quoniam verò (1) Plerorumque casuum Historiæ speciales, cum omnibus circumstantiis suis, Subjecto, & Causis Morbi, Temperie, item, Ætate ac Statu Ægri, prius enumerandæ essent, cum Prognosi, & applicatione Legum Methodi: (2) Hoc verò nimis prolixum futurum sit. (3) Ex Lege contrariorum, ductu Capitis IV. & VI. præsidia medendi aliqua, per consequentiam non difficilè hauriri possunt: (4) Et Modum curandi tandem ex Libris præsertim Celeberrimorum Virorum, qui de Lue Venerea ex professo scripserunt, satis superque colligere est: ideoque non necessarium ducimus, prolixa doctrinæ capita hanc in rem afferre: quin pauciora tantum hæc ac breviter, de *Scopis Medendi præcipuis*, qui sicut in Lue Venerea pene omni, ita imprimis in modo-dictis Ægritudinibus, occasione Mercurii subortis dantur, sufficiant; præsupposito, quod Virium servandum ante omnia ubivis ratio habenda sit.

II. (1) *Primus Medendi Scopus* præcipuus dicitur, *Causa Continentis*, quæ curationem aliàs impedit, *Sublatio*.

III. Hæc *Causa Continens* verò, in tanta Malorum *Iliade*, non est in omnibus omnium Individuorum partibus, ejusdem semper generis, aut una. Quin triplex potius;



tiùs : vel *Humor* ; vel *Virus subtile* ; vel *Mercurii pars*,  
post Salivationem in Corpore superstes.

IV. *Humor peccans*, præterquam quod peculiarem  
& destructivam Acredinem suam, convenientibus digesti-  
vis, attenuantibus, fundentibus, antiscorbuticis, & acutas  
salium cuspides invertentibus, Acorem Chyli item circa  
primas Corporis Vias temperantibus, aut Correctivis aliis,  
emendationem sui indicat ; non ultimò etiam, quatenus  
motu, loco, aut quantitate simul peccat in aliquibus mem-  
bris, Imminutionem, Aversionem, Evacuationesque sui  
exigit tam Universales, quàm Particulares.

V. *Universalis Evacuatio Purgatione* partim, partim  
*Sanguinis Missione*, exigitur. Ex quibus, de *Purgatione*,  
quidem possit moveri scrupulus. *Botallus* verò de Lue Ven.  
c. 2. §. 24. seq. eam valdè urget, ut Humores ad similem pu-  
trilaginem dispositi maturè eliminantur, nec malum fove-  
atur ; dicitque expressè, Curationem sine Purgatione rarò  
benè cedere. Intellige moderatam, lenem, ac facilem,  
quæ Canonistis Minorativa dicitur. Dumque *Venasectio-  
ne* prætereà cautè etiam utendum (in ipsismet Plethoricis)  
est ; interdum tamen summoperè necessaria est ; in casu  
videlicet eo, ubi Lingua in Salivando enormiter intumue-  
rit. Illiusque culpà *Fallopius* d. Morb. Gall. c. 76. Suffo-  
cari vidit Homines. Ipse verò præmissis Cucurbitulis,  
Venam secace fecit ; & benè successit.

VI. *Evacuatio Particularis*, Salivæ tardiùs egressæ  
Promotionem, per Salivales gargarismos, (quadantenus  
fortè & Errhina) instituendam comprehendit. Imprimis  
verò Curationem Magneticam per Aurum ; de qua tum  
supra aliquid (thes. 18. Cap. VI.) dictum est, tum mox mox  
dicetur.

VII. In-



VII. Interim per *Virus subtile* thes. 3. modo intelligebatur Miasma Venereum, Spiritale, pravam ut supra (Cap. 1. th. 7.) nominavimus; per quod videl. Lues imperceptibiliter non partium solum, Vestium, aut lintheaminum contactu, sed vel sola Calicis superficie, ex quo infectus aliquis bibit, communicatur alteri, lateque clam serpit, & *Sudoriferis* imprimis est expellendum, tum per interna, Theriacali Virtute prædita, Nervisque amica; tum externa: quibus præsertim suffitus subtiles balsamici, ac *Therma* continentur.

IIIX. *Therma* inquam. Licet enim suspectæ hæ possint videri aliquibus: ob insignem tamen ipsarum, poros aperiendi, ac resolvendi vim, rectissime probantur, suffragante *Claudino*, qui (Append. ad libr. d. Ingr. ad Inf. sect. i.) testatur, *Pene Sacros Effectus* producere.

IX. *Particula* demum *Mercurii*, post Inunctionem, Suffitumve, in Corpore ægri *superstites*, omni studio sunt abigendæ: quod fit tripliciter; vel *Expellendo*; vel *Divercendo*, (& postea per alvum tollendo) vel magneticè *Provocando*. *Expulsio* fit per Diaphoretica aut Sudorifera, in thes. 7. modo expressa; à quibus neque etiam (pro circumstantiis certis) *Diuretica* excludimus. *Diversio* fit ope Medicaminum ex Sole & Luna, tanquam Metallis, Mercurio imprimis familiaribus, suffragante (in tali casu) *Glabero* part. 2. Furn. Philos. c. 28. fin. Quin hoc ipsum jam pridem *Fallopium* (de Morb. Gall. c. 77.) tanquam *Secretum Mirabile* laudavit, ut nempe Ramenta Auri vel bibantur, vel in Pilulis sumantur. *Provocatur* suffitu Decocti Granorum Juniperi, juxta experimentum multiplex Medici cujusdam, in Observationibus *Reusneri*, à *Velschio* editis, (observ. 174.) & detentione *Nummi* vel *Annuli Aurei* in Ore, vel



*Globuli similis in Nare.* Qui quam primum affatim dealbati, & quasi argentei facti sunt, rectè suadet *Fallopius*, ut prunis injiciantur (quo Mercurius rursus deflagret) pristinoque nitori fulvo redditi, iteratò assumantur, (usquedum nulla ampliùs dealbatio succedat.)

X. Istaque omnia ideò, quod *Mercurius in Corpore detentus* nonnisi plura semper, gravioraque mala inferat.

XI. *Quo pacto verò noceat Corpori*; an Frigiditatis excessu, Sanguinemque coagulando? vel liquando Humores crassos? vel corrodendo? vel Occultiore qualicunque aut Secreta Vi? (ignorantiæ Asylò) cum tamen, magnâ sæpe quantitate crudus, ac currens impunè intrò sumatur: vel per modum Fermenti peculiaris? vel potiùs *per Modum* multiplicatissimæ cujusdam variorum vasorum Meatumque *Obstructionis* (uti in Hydraulicis, datâ Obstructione Castelli, Piscinæ, ut Aquæductuum, alicubi quoquo versum exundant Undæ, quâ patet transitus,) quatenus nempe Humores grossi, subtiles, imò ipsi Spiritus Nervei, quorsumcunque possunt, regurgitent, & pro dispositione partis, quantitate, & qualitate colluviei, brevioris ejusdem aut longioris in partibus moræ, & inde contractâ acescentiâ, (ad corrosivam usque diathesin) Mala adeò intricata, multa, foedaque pariant, ut Lues Veneris videatur pessima Fax ex Pandoræ thecâ; citra ullam tamen Venenosæ naturæ in hærentiam; & solo potiùs figuræ atomorum globularis, sensim in partibus auctæ, citoque in se revolutæ, Sitûs, ac Morûs vitio; quæ novissima, atque ad detrahendam Mercurio, omnem prorsus Veneni suspicionem, curiosè à *Dn. Praside* ventilata, mihi que benevolè concessa, *Ejusdem Hypothesis* est; eaque vel ideò valde verisimilis,

F

quod



quod vel pleræque, vel omnes *Mercurigenæ Aegritudines*, ex sola ea, tanquam cognoscendi Principio Universaliore, facillimè declarari possunt : In Istorum recensione etiam, aut evolutione (imprimis quod laudatus *DN. Præses* peculiari Scripto forsan mentem suam hac de re prolixius aperiet) tanquam in re sublimioris indaginis, pluribus jam quidem non audeo occupari. Quin hæc de *Primo Medendi Scopo* hucusque dicta sufficiant.

XII. (2) *Secundus Scopus* præcipuus dein consistet in *Morborum*, in partibus relictorum, *Curatione*; temperando intemperata, obstructa aperiendo, detergendo sordida, tumida emolliendo, digerendo, resolvendo, suppurando, Corrosivis aut Igne absumendo; erosaque, quàm fieri possit, restituendo; aut semimortua ad Vitæ usuram commodiorem reducendo.

XIII. In specie verò *Faucium cum Lingua, Gingivis, ac Dentibus* ratio æquè habenda est. Dictumque superius, non sine causâ, aliquid fuit de *Elotione Oris* per Lac ac Gargarismos, mitigandæ Inflammationi istarum partium dicatos. Contra *Erosiones* verò, putredinemque *Gingivarum*, præeunte *Foresto*, lib. 32. Schol. ad Obs. 22. ita circiter procede: Collue *Gingivas* primùm decocto *Tormentillæ* vel *Ligni Indici*. Post absterge hâc Mixturâ: Rec. Mell. Rosar. Unc. i ꝑ. Ebor. usti, Ros. alb. Off. *Sepiæ*, *Myrrhæ*, Aloes, an. scrupul. j. Desicca tandem cum communibus *Dentifriciis*, &c. ac *Dentium* sordibus ac *Vacillationi* subveniri poterit tali pacto, ut nitidi rursus ac firmi reddantur. *Faucibus* probè mundificatis, cum Decocto fol. *Plantagin.* Rosar. *Salviæ*, &c. in *Vino austero*; *Dentifricia*, ut par est, adhibeantur, quâ liquidâ, quâ siccâ, *Aluminis* particulam.

utrin-



utrinque recipientia. Et ex liquidis Tinctura Lacca *Myn-*  
*sichti*, ad Scopum præsentem paulum mutata, futura est u-  
na è præcipuis.

XIV. (3) *Tertius Medendi Scopus præcipuus* in Tute-  
la virium uleriore; & (4) *Quartus in Mitigatione Sympto-*  
*matum* consistet, incipiendo ab iis, quæ magis urgent, &  
respiciendo cautè ad quidvis, quodcunque indicationem  
aliquam utilem juvet ac roboret; vel contra indicando ei-  
dem obsit: de quibus Medicus sagax, cum Chirurgo, pro-  
re natà, maximè viderint. Hic tandem de *Hermete Metal-*  
*lico* jam sit actum satis: Hic sit noster

Finis,

ET STATUA PLUSQVAM

MERCURIALIS:

GLORIA. SOLI. DEO.

---

**H**eu Tibi, quæ tandem Tibi nubet, Amice, Puella,  
Obscœnam dicis qui Venerem Furiam?

Qui gratos aliis, suspectos reddis Amores?

Heu Capiti, vereor, dulcis Amice, tuo,  
Quàm vereor, ne fortè novum lapis Orphea plectat,  
Dum das Fœmineo tot mala verba gregi.

Balnea, Vina, Venus, conservant Corpora nostra:

Ast Tibi vix aliud Balnea, Vina, Venus,  
Quàm lethale nefas, & Toxicæ dira videntur:

Tristeque erit, medicè vivere, lege tuâ.



Ne moveare tamēn. Furtivos carpis Amores :  
Et quān sint vetiti prēmia foeda thori,  
Purā mente doces. Venus est inimica Minervæ :  
Commendat Musas nil, nisi castus Amor.  
Ite procul Veneres, quarum nascuntur in hortis  
Germina, Mercurii falce secanda gravi :  
Ite procul Furia, sublimi pectore dicis.  
Una sed è multis casta Puella Tibi  
Coelitus obtinget, Studiorū fine peracto :  
Moxque Tibi Laurum Cimber Apollo dabit.

*l. m. g. scrib.*  
*Clariff. Dn. Doctorando,*  
*Disputationis suæ Inauguralis*

PRÆSES.

